

京山府人吏祖政堂文學兆年父同知密直褒仁任子前大護軍璫考功佐郎珉曾仕高麗督判承寧府事姜筮尚州牧使權執經見仕本朝於臣宗系各別伏望 聖慈垂察令臣宗系得蒙改錄一國幸甚謹具奏聞○遣蓮城君金定卿賀正兼獻三年一次種馬五十匹○使臣王廼齡崔榮還 上餞于宣義門外臨別以毛衣毛冠及靴贐行二人皆不受 上曰路上禦寒入中國溫和之地棄之何害今天氣寒甚道途遙遠若不受而歸何敢安心非敢為人事乃主人之誠意也崔榮對曰發京之時禦寒之服既以備足且 帝知復命在於寒時禦寒之衣亦多賜焉何必受之主人誠意已知之矣凡贈遺之物鞍馬外皆不受三府餞廼齡等於西晉通廼齡謂右政丞成石璘曰公必知李穡如李穡者中原亦不過一二中原之人豈盡如朝鮮之人乎朝鮮不可以外國視之也○庚寅擇鷹房人十六為定額餘皆罷之○辛卯日沒時日北有赤氣外青○黃儼遊檜巖寺命三府及知申事朴錫命餞于東郊○壬辰日抱內青外赤○